

COMUNICATO n. 920 del 16/04/2025

Pel tor pèrt tousc dai 18 ai 29 egn per ge fèr front a la endesfides del raion alpin

Consei di joegn Eusalp, candidatures avertes enscin ai 31 de mé

[Ladino] Mudament climatic, smendrament de la biodesvalianza e semper più trafich te la valèdes: l raion alpin l cogn ge fèr front a desvaliva endesfides per cheles che ge vel la colaborazion de la desvaliva regions te la Strategia de l'Union Europeèna per la Region Alpina (Eusalp), acioche l raion de la Èlpes l sie più fort e enjignà per l davegnir. Ence chest an, i joegn i pel dèr sie contribut per arjonjer chest obietif te la vida più sostegnibola che l é meso, col tor pèrt al Consei di joegn Eusalp. I joegn anter i 18 e i 29 egn che i vif te una de la 48 regions che fèsc pèrt de Eusalp te la Tèlia, Germania, Franzia, Austria, Slovenia, Svizra o Lichtenstein i pel portèr dant sia candidatura enschin ai 31 de mé del 2025.

L Consei di joegn Eusalp l vegn metù adum da 28 membres (cater per vigni paisc alpin) che à la encèria per un an, col met de renovament per n auter an.

Na piataforma che va sora la seides fora per l empowerment di joegn

L Consei di joegn l met a la leta na piataforma acioche i joegn i tole pèrt a duta la dezijions di orghegn Eusalp e l arsegurea che sia idees e ponc de veduda i vegne conscidré. I partezipanc i se dèsc ju tel svilup de politiches e projec a livel alpin per ge fèr front a la endesfides più de prescia. I pel portèr dant azions concretes, projec e scomenzadives, portèr dant idees ai politics di Stac e de la regions che fèsc pèrt de Eusalp e sensibilisèr su la particolaritèdes de sia regions a livel european. I joegn i se endreza e i empèra a tor pèrt a n prozes democratic, col se confrontèr con desferenzes linguistiche e culturèles. Tel medemo temp Eusalp l empèra dai joegn e l tol su neva idees da chi che vivrà l davegnir de la Èlpes.

L Consei l se bina cater o cinch outes per ogne mandat e l colaborea via per dut l an tras strumenc de comunicazion virtuèla te gropes tematics per svilupèr ativitèdes concretes. I joegn enciarié i se dèsc ju per la mobilità sostegnibola, i se colea con altra scomenzadives de joegn, i laora su la prospetives che vegnarà te la regions alpines periferiches e i sensibilisea sul patrimoniè naturèl e culturèl de la Èlpes.

La candidatures enschin ai 31 de mé del 2025

I joegn enteressé i arà temp enschin ai 31 de mé per se candidèr, tras l sit

<https://alpine-region.eu/alpine-youth/get-involved>. L obietif del Consei di joegn l é chel de meter dant la desvalianza che l é tel raion de la Èlpes, per chesta rejon la selezion la vegnarà fata, per arsegurèr na composizion balanzèda anter i joegn candidac di set Stac Eusalp, ic o eles, aldò de la provenienza e de l'esperienza te organizacions di joegn. I Stac e la regions Eusalp i corirà i cos de viac per la scontrèdes e i evenc a chi che i tolarà pèrt i componenc del Consei e i sporjarà sia consulenza e didament.

L Consei di joegn l vegn finanzià dal projet Spazio Alpino Interreg "Support Eusalp", de chel che l partner prinzipèl l é la Region Provenza-Alpi-Costa Azzurra. Tel chèder de chest projet, la Region Bourgogne-Franche-Comté la é responsabola de la ativitèdes dedichèdes ai joegn. Estra apede, tel 2025, la co-presidenza Austria/Liechtenstein de Eusalp la ge dèsc n muie de emportanza al tor ite i joegn.

Per n saer de più:

Sit del Consei di joegn de Eusalp: <https://alpine-region.eu/alpine-youth>

Informazioni su Eusalp: <https://alpine-region.eu/>

enjontà: placat

Traduzion di Servijes Linguistics e Culturèi del Comun general de Fascia

(cdt)